

Dèwà She Mɛ Mbì Sɛ Piêr Kɔe

Mè hwæsi Piêr

1 ¹ Mùn Simôn Piêr ne ta byin dèwà ton sɛ kɔi. Mùn ni ci-she Yesù Kristò, mùn bɛ tì ku' ci-ntwum nyon. Mùn kɔ' son lè byin bɛ keà mè nlim nyin ke nywi Yesù Kristò, mbanmban wě bwi'. Kě nlim màzwùm cinni ñtwu ke mɛ' ye', bwi' lè byin mban. Mvènnswàb ne fɛ bwi' son ke nyě she lwinni sɛ Yesù Kristò cie nun, nun ne ðyi Ci-nswæti nyɛ', à bɛ tì Mvènnswàb nyɛ'. ² Mvènnswàb ngænnì byin, à fɛ byin flɔa kwan hwæn ke nlimmì ye byin limmi nun bon lè Nyeli nyɛ' Yesù Kristò.

Bɔlèni lè byin cinni kwù kèn she lwen

³ Ke nkimmɔ' yon nun, Yesù Kristò ci bwi' limmì Mvènnswàb ne lon bwi' lè bwi' ton lè nun ke ntwu yon nun, bwi' ci tì ku' lwen wě nun. Li, ke nlimmì màzwùm nun, à feà bwi' ywum hwæn ye ta bwi' kpea ke mbyi nyon nun, lè bwi' cinni kwù kèn she Mvènnswàb yili. ⁴ Ke nyè ywum màzwùm, à lwinnzi ñkàli twun ye nun lelakà' ñdikà' ñwé. À feà bwi' yì ðàsi lwukea. Yì ðàsi màzwùm ye cì byin nywæli ywum byibbɔa ye bwum ta tæm ke cě ngyɔ' wan, byin cinni tì ku' m̄fɔkà' fɔ' lè Mvènnswàb. ⁵ Ke à si li, mùn shè byin lɛ, ke byin keà ñlim ke nywi Yesù Kristò, kpæmmèni me', byin konndi kwù kèn she lwen cinni. Kwan se byin ta kwù kèn she lwen cinni, byin konndi tì kon cinni ke mwu. ⁶ Kwan se byin cinnâ kon ke mwu, byin konndi bɛ mè ci-mbæn nlim. Ke nyè mbæn nlim yi, byin konndi bɛ mè ci-mfyimnzi le'. Ke nyè ye byin bɛ mè ci-mfyimnzi le', byin ci tì ywum hwæn wě tà she Mvènnswàb yili. ⁷ Byin cime ywum hwæn wě tà she Mvènnswàb yili, byin konndi tì mè ngyinni yili ke nyinnim shin nun. Byin yilime bon li, byin konndi tì ku' bwum hwæn yili. ⁸ Beshe mbòkì tòn nyin ni wě ywum ye mun tannzi ye, lè byin ci tì ku' yon li kwan mèan hwæn, lè lenkæm, byin ye Yesù Kristò fɔsi limmi mbyimbyì, mè she nyin kwannzi tì ku' mwù. ⁹ Son, mwum ne cinni kan ywum màzwùm ke kwæ' nywi shon nun, à ni wě ci-bwubè ne tà ka swum ndɔ' yenni. Ñlim fyeà nun lè Mvènnswàb zùsà nun byebbi ne nun cie mbyì.

¹⁰Mè ñgyinni byêm, kpæmmênì me' lè ñkè mwu ke ywum màzwùm nun bǎ byin lisà' pisean le Mvènnswàb yànnà byin, à lon byin le byin be bwum byon. A byin ci li, byin ba pyì ke byebbi nun. ¹¹Li, Mvènnswàb yě byin mbyi donnzi mgbonmgbon lè byin òn ke ywǎ' Nyeli nye' Yesù Kristò nun. Nun ne òyi Ci-nswæti nye'. Ywǎ' shon si òwùmdwùm.

¹²Li ne ci, kwo fe' she byin limmà ywum màzwùm nùn, byin òyi ti kimmi ke leñkàm she be liseà byin nun, mùn yě ti byin yon bunnzea kwan hwæn. ¹³Ñgyìn ye mùn ke ke cě ñgyó' wan fe lè me' ye, mùn yen le à si lwen le mùn bunnzà' byin ywum màzwùm bǎ byin konni. ¹⁴Ntwi' se mùn limmi le kwan ba tí làbbi lè mùn ywi wě tà she Nyeli nye' Yesù Kristò shèe mùn. ¹⁵Mùn yě lo' òli lè mùn lisà' byin mbyi ndǎ' ne byin ye ñzǎ' le' yi bunngea nun kwan hwæn lè mùn ywià mùn.

Swum se lisa' le ñzǎ' le' Piêr yi leñkàm

¹⁶Kwan se òwi' shee byin mbòkì ne Nyeli nye' Yesù Kristò bènne lè ñkimmǎ' yon nun hwæn, mè pwin me ñkàen ndǎ' ye mwum wan ne ghe ye òwi' be kǎn òwi. Son, òwi' yenne ñtwu yon lè mè me' ye'. ¹⁷Kwan se Ce nye' Mvènnswàb fee nun ñtwu, òwi' ywǎe ñkwu Mvènnswàb ne cinni ñtwu à lan ywum hwæn, ye she le: «Nyě ne òyi mwen nlim nyèm, mùn ké nun ke nzwon nlim nyèm.» ¹⁸Òwi' ne', òwi' ywǎe ñkwu màzwùm ñwǎl ye ke nlim òeb, kwan se òwi' be ke kpa' sanmi zwem òwi' lè mè Yesù.

¹⁹Li, òwi' ta òsi zwùm teli lè ñzǎ' le' ye mè ci-nleli ke ñwum Mvènnswàb nun shekà'. À si lwen le byin nonnzi mè ywi' ke nzǎ' le' ye bon be shèe nun, ntwi' se à yi wě win ye ta nyànni ke ñjimmi nun, han a ken bèn kwan se shikpon ye òwùmni. Ke kwan màzwùm nun, nun ne òyi nywǎ' ne tá òwùm moan shikpon yě mè nlim nyin ñwannzi. ²⁰Swum zwimbyi' se mùn yili le byin limmi, à si le, ñzǎ' le' ye be kǎ' ke òwǎ Mvènnswàb nun, ye konndi ti kwan ke ñwum me ci-nleli ke ñwum Mvènnswàb nun, be wòle kǎn be sù yon lè bon ne'. ²¹Ntwi' se ñzǎ' le' Mvènnswàb tà ka wai ke me mwù nyan nun. Son, Mpùn Nsanmi ne bènne bon nywi bǎ be leli ke ñwum Mvènnswàb nun.

Mè nlisà' me ci-me mbwè'

2 ¹Ke kwan se be mbyì nun, mè ci-ntwum me mbwè' kwaen ke nyinnim ñkwìn bwum Mvènnswàb nun, mbanmbǎ' ku', mè nlisà' me ci-me mbwè' ye ti ku' kwan ke nyinnim shin nun. Be ye byin ñjè me mbwè' shé, ye ye byindo' mè mwù kyèa. Kwo fe' Nyeli nye' ne swæti bon, be ye nun byinnǎ. Ke nci ye bon ye ci li, be ye vèné' twun ndǎ' teli ke nywi yan ne'. ²Màn bwum yě mè kwù kèn byibbǎ byan òwon. Ke nyě yi, bwum ònmi mbyi leñkàm kòlea. ³Mè nlisà' me ci-me mbwè' màzwùm bi mè ci-ntæm ywum, li, be ye byin mbèti lè ñzǎ' le' pwinpwin ye bon ne' ta ghe, lè bon se byin nywi. Son, Mvènnswàb òsǎ kyitǎ' shan ñdikà' ñwé. Kwan nzwonme kwǎ', à yě bon mlòsi ñgyinmbǎ'.

⁴Ce'èni fe', Mvènnswæb donnze kǎn mè cikpu' bye ke nlim dɛb bye cie byebbi, son, à bæne bon, à dwið' bon ke swu' win nun, cìcì se bon ta tòn kwe kpimmea ke njimmi nun, lè bon bonngà' ñgyin ne Mvènnswæb yě bon mè kǎ' lànnzi nun. ⁵Bwum bɛ be ke kwan Nòè nun, Mvènnswæb donnze kǎn tì ku' bon, son, à cìe ndwin ndwun kìn bwum byibbɔa bi she. À suku' Nòè swæti lè kì-shanmbi bwum ndɔ', nun ne be bwum le' se ke mbyi leŋkǎm nun shě. ⁶Ti lè mè myi ne bɛ bɛ lon le Sòdòm bon lè Gòmôr, mè myi mbi màzwùm, Mvènnswæb buse nun lè win. Ke ncì ye li, à lisà' bwum byibbɔa bye tà ka Mvènnswæb mwumzi mbòki swum se ye bon lànnzi nywi. ⁷Son, à nywàse mwum ñlwinni mbɔ' ndɔ' ne bɛ bɛ lon le Lôt. Nlim yon be kpanndi zwum lè ntwi' mè kikǎn mbyibbɔa ne bwum me nsòn màzwùm be cì. ⁸Ntwi' kwan se nun be tòn kwe nyinnim shan nun, mè ñgyinngyin, à be ywɔ', à yen tì ku' mè le' mbyibbɔa nyan. Li, ñlim be nun kpeli ke zwum ke nyen ye nun be yen li.

⁹Mè mbòki le' ne tòn ne hwæn lisa' bwi' le Mvènnswæb limmi mbyi ne nun yě fyi lè nun swæti bwum bye mwumzi nun, lè byi bi nywæli ke me vènè' nun. À limmi ti ku' mbyi ne nun yě fyi bǎ nun bæne mè ci-ncì byebbi, lè nun yennzi bon vènè' ke ñgyin ne nun yě mè kǎ' lànnzi nun, ¹⁰a lan lɔ' dýè bwum bye kwèblea, bɛ konndi tì ñkimmɔ' Mvènnswæb ñjili.

Mè nliàs' me ci-me mbwè' bye mùn shí byin mbyí bi, à bi ze' mwu kimmi, bɛ tà ka mwum ndɔ' yi, kwo fe' mè cikpu' Mvènnswæb bye cinni ñtwu ke dɛb. Bɛ ta bon fyòn sìmmɔa nún. ¹¹Mè cikpu' Mvènnswæb bi bon ne', kwo fe' she bɛ lan mè nliàs' me ci-me mbwè' bi lè ñkimmɔ', bɛ tà ka bwum bi wèsi lè mè nsèm ke swi' Mvènnswæb. ¹²Son, bwum bi ta ku' bon ywum cìɔ' lè mwù dín. À bi wě mè nyàm bye ke mbo nun, bye bɛ ta bæne lè bɛ wu. Bwum bi ta ku' ywum su' sìmmɔa dín shìki bɛ limmi mwù. Leŋkǎm se, bɛ ye ywi wě mè nyàm ke mbo nun. ¹³Vènè' ne bon yennze bwùlu, bɛ ye ku' bon fyòsi bɛ lè vènè'. Ntwi' se kwo fe' ñganngan nywɔ', bwæ' tà ka bon kwènni lè ñcì ywum byibbɔa wě tà she mè nlim nyan yili. Kwan se bɛ kin byin cinni, byin ji tì ku' ji lè bon mbanmban, à si byin le' kwènnjin. Bɛ ta byin pɔkea, li, ñlim dúnmi bon lwukea zwum lè mè bèb nyan. ¹⁴Bwum màzwùm, mè nlim nyan tà ku' su' kèn ke nlon me sibɔ' nun. Bwæ' tà ka bon kwènni lè ñcì byebbi. Bɛ ta bwum swublea pyìsi ke byebbi nun lè mè bèb nyan. Mè nlim nyan tǎ su' dýi kwan hwæn ke ntæm ywum nun, li, ñke Mvènnswæb ye bon bænni. ¹⁵Bɛ dwiá mbyi leŋkǎm be nyè, bɛ bwuð' pedín. Bɛ ta mè kwũ kèn Bálám mwen Bòzôr dwon. Mwum màzwùm ne bɛ lwèn ywo lè ñcì byebbi bǎ nun yè lòn. ¹⁶Son, Mvènnswæb wèsi nun ntwi' se nun fyinnzi ñwum yon. Ke kwan màzwùm nun, m̀v̀æ̀m̀ndè dúnmi leli lè nun wě mwum, a twɔ' she mgbòta se ci-nlèli ke ñwum Mvènnswæb nun ni yili le nun ci si.

¹⁷Bwum bye mùn shèe byin bi, à bi wě mè mwù dɔ' ne swimmɔa nún. Bɛ bɛ tì ku' wě dɛb mvu se m̀p̀ùn ta twɔti. Mvènnswæb f̀s̀á bon cì tòn

shan ke njimmi nlo nun le fyii. ¹⁸Be ta mwù twuli ke bàbà nun lè òzǎ' le' pwìnpwìn mèan ye ta fon kwean ke ñwum. Li, be ta yili le fon òwusi tì òwum bye ke kwaìn ke ñkwìn òwum bye ke ke njimmi nun. Be mbeti bon, lè byi bi ci ku' mè le' mbyibbɔa wě bon. ¹⁹Bon le: byi bi ye be lè mè mwù nyan. Son, bon ne' be ta le' li bi bi mè son mè le' mbyibbɔa. Ntwi' swum se mwum tǎ mwù ké ke nlim ñzwɔnzwò, lè à ni son swum màzwùm. ²⁰Beshe mwum ndɔ' donnzâ mè le' mbyibbɔa ntwi' se nun limmi Nyeli nye' Yesù Kristò ne dɔi Ci-nswæti nye', ke nyě yi, à kònnɔ tì mè le' mbyibbɔa ònmi be, mè le' mbyibbɔa màzwùm ne nun fyòn kè ke swiswi', mwum màzwùm, à yě vènè' yenni ke tòn shon nun, a lan she be mbyi. ²¹Se bē lwen ke ci shon le ba à kè kwù ke mbyi Mvènnswæb nun, lè she nun limmâ mbyi màzwùm, son, à yònnzì nyè lè le' Mvènnswæb. ²²Bwum màzwùm tǎ mè ñkæm le' nyě be ta òwì lisea le à bi leñkæm, nyě be òwì le: «Swum se mwen mbyi' tǎ gbu', à tǎ fyòn be lè nun ji son.» Nɔɔ' ni tì le: «Kìpu' se be ɔɔsi jene ta kën son ne' sonnzi be ke me mlǎ' nun.»

Mbèn ye Nyeli nye' Yesù Kristò yě bèn

3 ¹Mè ñwè byêm, dèwà she me mbi se mùn koi byin se. Ke yi dèwà bī yi nun, mùn tǎ byin ywum ye byin ywǎ mbyi' nùn bunnzi, lè byin konni. ²Mùn yili byin bunngà' ñzǎ' le' ye mè ci-nleli ke ñwum Mvènnswæb nun lelakà, kònnɔ lè ye Nyeli nye' Yesù Kristò ne dɔi Ci-nswæti nye' be byin shé ke me ñwum mè ci-ntwum byon bye nun fyie byin. ³Swum zwimbyi' se mùn yili mùn she byin si le: Ke ñgyìn mmlòkà' ñgyǎ' wan nun, mè ci-ñgɔla' ye kwan, lè be ta ywum cí wě tǎ she fon yili. ⁴Be ye byin kɔlea lè be ta shè le: «Yesù Kristò cie kàn byin ñkàli le nun yě bèn? Son, à ni fen? Nɔdikà' ne mè mbibea bye' ywie, ɔwi' yen le ywum ta ku' fon lànnzì wě ke ndunmi ñgyǎ' wan.» ⁵Bwum be ta le' li bi, be yili kan fon limmì le kwan se Mvènnswæb fɔe deb lè ñgyǎ', à cie ywum hwæn kwan ke nleli yon nun. À fɔe ñgyǎ' fon lè mlǎ', à ci mlǎ' senndi, òn ñgyǎ' kwan be. ⁶Mlǎ' ye Mvènnswæb wue ɔwum mbyi' nun kwan se nun fyie ndwin ndwun à kìn fon she hwæn pæ'. ⁷Nleli yon ye ye tì ku' ci deb lè ñgyǎ' ye ɔwi' ta yen jene ye ye tòn kwe, a ken wòli kwan se nun yě yon twènni lè win. À yě tì yon ké kwe a ken tì wòli ñgyìn ne nun yě ɔwum mè kǎ' lànnzi, à mlòsi tì mè ci-nci byebbi hwæn.

⁸Mè ñwè byêm, ñzǎ' le' mbo' ndɔ' ni kwe nyě ba ñlim fye byin lè nun. Ñzǎ' le' màzwùm ni le, ke me' Nyeli nye' Mvènnswæb, ñgyìn mbo' ni ke ci shon wě òwùm ñkæm, òwùm ñkæm yi ku' ke ci shon wě ñgyìn mbo'. ⁹Byindo' ta bàkà' le Mvènnswæb tǎ ka pwæti ywum ye nun tǎ leli lwinnzi. Son, li ne ban. À tǎ ñlim bænni ke ntwi' yin, ntwi' se à yili kan le mwum ndɔ' ɔwu. À yili le mwum hwæn yonnzì ñlim yon, à kyìli lè byebbi.

¹⁰Mwum ndɔ' limmi kan ñgyìn ne Yesù yě bèn. ñgyìn màzwùm yě ɔwi' semnzi nun wě tǎ she ci-nywi' tǎ bèn. Ke ñgyìn màzwùm nun, deb ye

ɓwu lè ywum ta twùm le bòdò. Win ye ywum ye zwô busi hwæn. Ywum ɲgyɔ' wan, kòndi lè ɲgyɔ' nun ne', ye ye ku' fya' hwæn. ¹¹Ke ywum hwæn ye ɓu' li, yã kwù kèn se se yili le ɓyin cinni? Se yili le kwù kèn shin ɓe sanmi, ɓyin mwumzi tì Mvènnswæb lè ñlim fɔ'. ¹²Suèni me' kè ke ɲgyìn màzwùm nun, ɓyin kimnzi nywi lè ñcì ywum lwukea, ɓã ɲgyìn ni pwæti bèn. Nywɔ' màzwùm, win ye ɗeb twènni, ye busi son, lè ywum ye kwe zwô hwæn. ¹³Son, Mvènnswæb cìe ɓwi' ɲkàli le nun yě ɓwi' ɗeb she nywæb lè ɲgyɔ' nyě nywæb fò. Ke kwan màzwùm nun, ywum ye su' ɓe wě tà she Mvènnswæb yili. Son se ɓwi' ta bònɲgà'.

¹⁴Mè ɲwè ɓyêm, ke mbònɲgã' ɲgyìn màzwùm nun, kimnzèni nywi lè ɓyin cinni kwù kèn she lwen, ɓyin ɓe sanmi ke me' Mvènnswæb, shìkì ɓyebbi ndɔ' ɓe ku' ɓyin ke nywi. ɓyin ton tì ku' ke mla' flɔa nun. ¹⁵Limmèni lwen le Nyeli nyè' Yesù tã m̀bèn yon mgbànnzi ntwi' se nun yili le mwum hwæn swæ'. Li ne ɲgyinni nyè' Pól nyě ɓwi' yili ñzwɔnzwò' koi ɓyin ke ɗèwà shon nun. À kɔ' yon lè kon se Mvènnswæb fèe nun mwu nun. ¹⁶Lè' fɔ' màzwùm se nun tã kwùbtà' ke yi ɗèwà yon nun hwæn. Ke yi ɗèwã màzwùm nun, yì cìcì ndɔ' yi kwe nlim kyibli, ye ɓwum tà ka pwæti ywɔ'. Mè nshì-nlimmi ɓye ɓæn kan le' Mvènnswæb lè leɲkàm, ɓe ta yì cìcì màzwùm yònnzea wě tà she ɓon yili. Mbanmbɔ' wě tà she ɓe ta yì cìcì nzæ' le' Mvènnswæb ndɔ' yònnzea li. Ke ncì ye ɓon ta cì li, ɓe ta kyitæ' Mvènnswæb tɛli ke nywi yan ne'.

¹⁷Son, ɓyin mè ɲwè ɓyêm, m̀bòkì ne ɓyin limmã ywum màzwùm jene, konnèni lwen lè yon, ɓyin làkì mwù kě lè ñzæ' le' me mbwè' ye ɓwum ɓyibbɔa ta shè, ɓyin ɗonnzi cě ɓyin twɔ' kwù nun kimmi. ¹⁸Kènnèni mbyimbyì ke mbyi Nyeli nyè' Yesù Kristò nun, ɓã ɓyin fɔsì nun ne ɗyi Ci-nswæti nyè' limmi lwen, ɓyin limmì tì ku' m̀bòkì ne nun tã lwen cì lè ɓwi'. Ntwu ɓe lè nun ñɗunmi ye jene han a ken bèn li kwan hwæn. **Àmèn.**